

四庫全書

子部

欽定四庫全書

山堂肆考卷二十四

明 彭大翼 撰

地理

池

說文池沼也穿地鍾水也

飲馬

廬州府含山縣有飲馬池卓刀泉在東關之巔相傳關  
公卓刀於泉飲馬於池

躍龍

成都府東南有躍龍池相傳隋開皇中伐陳鑿大池以習水戰郡志蜀王秀取土築城因為池有胡僧見之曰摩訶宮毘羅蓋以摩訶池為大宮毘羅為龍言此池廣大有龍也

留犢

壽州西南有留犢池魏時苗為壽春令始之官牒牛生一犢及去留之故池以此得名

靜蛙

湖州府安吉縣常樂寺有靜蛙池昔肇法師厭蛙聲聒耳驅而去至今池中不生科斗長沙府善化縣獄麓書院前有池夏無蛙聲相傳宋張栻讀書於此厭蛙聲禁之乃息南陽府新野東北有彈子池世傳漢光武彈蛙於此至今有蛙不鳴

玩鷺

宜興縣南有玩鷺池相傳王羲之玩鷺處

鳴鶴

三秦記魏在洛有天泉池流盃池陰流池鳴鶴池在鄴  
有瓊華池淥水池玄武池

影娥

漢武帝登俯月臺月影入池中如仙人乘舟笑弄月影  
因名影娥池

落妃

楊貴妃小字玉環弘農華陰人後徙居蒲州永樂之獨

頭村高祖令本金州刺史父玄琰蜀州司戶妃生於蜀  
嘗誤落池中後人呼為落妃池池在導江縣前

### 飲軍

慶遠府宜山縣城南有飲軍池宋景德四年軍校陳進  
叛圍縣城時池水久涸偶爾湧出閤門使曹利平賊飲  
軍於此池故名

### 浴仙

南昌府子城東有飲馬池一名浴仙池相傳有少年見

美女七人脫五綵衣於岸側浴池中少年戲藏其一諸女浴竟著衣化白鶴去獨失衣女不能去隨至少年家為夫婦約以三年還其衣亦飛去

洗耳

和州之西有許由宅宅旁有洗耳池

如意

杭州北山勝蹟有大悲泉如意池大悲泉在講堂下流繞殿前經如意池池以青石為之在方丈西鏤如意文

曲折迴旋可流觴焉

芙蓉

湖州府東白蘋洲上有芙蓉池中多千葉蓮唐開成中  
刺史楊漢公所鑿

蓬萊

唐憲宗嘗畋苑中至蓬萊池謂左右曰李絳嘗以諫我  
今可返也其見禮憚如此

聖母



徽州府黟縣東嶽廟後山有聖母祠前有池曰聖母池  
泉白如玉民有相訟者各執楮錢禱之實則沈虛則浮

仙女

柳州府象州東雷山之巔有仙女池深丈餘有仙女廟  
在焉

靈芝

晉宮闕記靈芝池有鳴鶴舟指南舟魏黃初元年有鵜  
鵠集焉

嘉蓮

嘉蓮池在無為州城北池中多植嘉蓮潁州府雋都縣西有瑞蓮池其蓮葉雙捲而劒脊其花雙頭其實曰覆鍾金鋌移之他處輒類常種俗傳雋山倒影所致

積翠

唐太宗宴羣臣積翠池酣樂賦詩魏徵賦西漢其辛章曰終藉叔孫禮方知天子尊帝曰徵言未嘗不約我以禮

凝碧

凝碧池在西安府城東南唐禁苑中安祿山反給事中  
王維為其所得祿山大宴凝碧池維聞悲甚賦詩痛悼  
云萬戶傷心生野煙百官何日再朝天秋槐落葉空宮  
裏凝碧池頭咽管絃後盜平或以此詩聞故維得減論  
下遷太子中允

興慶

唐景龍中中宗遊興慶池侍宴者遞起歌舞并唱迴波

詞喧雜失禮次諫議大夫李景伯亦起歌曰迴波爾時  
酒卮微臣職在箴規侍宴既過三爵誼譁竊恐非宜於  
是罷坐

葆真

世說葆真池即梁惠王故沼宋陳去非有夏集葆真池  
詩

覆杯

覆杯池在金陵古臺城太初宮中昔晉元帝頗以酒廢

政王導諫之帝因覆杯池中以為戒

洗鉢

地紀紫金山有猿驚鶴怨二谷道鄉太子二巖定心石  
桃花菜萸道士三塢洗鉢池應潮井道光泉

牡丹

牡丹池在嘉定州大邑縣牡丹亭側片葉纖芥墜池中  
則鴛鴦野鶩之類即啣去之

菱花

菱花池在南陽府鎮平縣西南俗名天池廣五里餘中有菱藕蒲芡之類

鳳凰

一在鳳陽府城西北相傳有鳳宿於此後魏有鴻鴈池

鷺鴨

見雪夜襲蔡城

洗參

彰德府林縣西有洗參池相傳為王母洗藥之所

溫蘇

溫蘇池在開封府後趙王石勒微時與李陽隣居數爭  
溫蘇池相毆及即位召陽與飲引陽臂曰孤往日厭卿  
老拳卿亦飽孤毒手池在山西遼州和順縣東北李陽  
村

太液

漢建章宮北有太液池中有蓬萊方丈瀛州壺梁以象  
海中神山又刻石為鯨魚池邊多雕菰紫葢及鷓鴣鵒

鵲之類動輒成羣

善泉

金陵古臺城東有善泉池梁昭明太子所鑿中有亭榭  
洲島太子泛舟池中嘗曰何必絲與竹山水可忘情

承露

三秦記漢上林苑有承露池昆靈池中有倒披蓮連錢  
符

浣雲



杭州舊報恩寺中有舞鳳軒浣雲池今萬松書院其故址也白樂天詩白雲本無心舒卷長自潔影落一鑑空可浣不可涅鳶飛魚躍間上下俱澄徹此意難與言覽之自怡悅

花馬

花馬池在陝西慶陽府城北周圍四十三里與馬槽亭羅湓泥鍋底等池相近

菡鶴

漢上林苑中有菌鶴池當路池太乙池牛首池積草池  
池中珊瑚樹高一丈二尺一本三柯四百六十條

報恩

丹陽縣謝家場北有報恩池相傳王姓者好食鱉一市  
必數枚庖婢每竊一二放之事覺恐被撻自投於池鱉  
叢負得不死故池名報恩

放生

唐肅宗詔天下臨城帶郭置放生池始於洋州興道迄

於昇州江寧凡八十一所顏真卿為碑銘古今詩話載  
唐末以邕州蔡大夫遷江西撫州刺史遊汝水放生池  
禁人採捕忽有人乘小舟釣其上蔡使人捕之釣者為  
詩云投却長竿捲釣絲手攜簞笠獻新詩臨川太守清  
如水不是漁人下釣時遂得免罪宋天禧四年王欽若  
請以西湖為放生池慶元初京兆尹趙師異亦請以西  
湖為放生池司業高炳如作記

鱣魚

廣西梧州府城東有鱷魚池搜神記扶南王范尋常養  
鱷魚十頭有犯罪者投之不噬則赦之廣東潮州府城  
東有鱷溪溪有鱷魚四足黃身脩尾形如鼉舉止趨疾  
口森鋸齒往往為人害鹿行崖山羣鱷鳴吼鹿必怖懼  
為鱷所得唐韓愈為刺史作文驅之鱷徙去六十里宋  
陳堯佐通判潮州以鱷食人命吏督漁者網而得之鳴  
鼓告其罪戮之於市

角鯉

角鯉池在長沙府醴泉縣東宋天聖中丁少連侍母觀  
網魚得火鯉命膾之庖人驚報魚頂有角魚已潰死少  
連祝曰魚若變化分當再活試之以水圍圍如初遂放  
於清石潭盧載為作送角鯉文

金斗

金斗池在廬州府治按天文一星在南斗曰合肥對九  
江星夾輔黃道今合肥縣入斗度獨多故號金斗城而  
池名金斗亦取此義

玉壺

元元統間丞相莫華捨地與僧法藏建普光庵中有玉壺池

百子

百子池在陝西西安府漢宮中嘗以七月七日臨百子池江西豐城縣有九子池

七女

七女池在漢中府洋縣昔人無男生七女父沒女各負

土合為一塚遂成此池

日月

日月池在會稽縣東北俗傳錢武肅王有目疾故浚此

池名以日月

風雨

風雨池在南昌府洪井之北西山之巔一名梅福種蓮池唐張九齡為都督嘗禱雨有應立風雨池廟以祀之

池有劫灰

曹毗志漢武帝鑿昆明池極深中間悉是灰墨無復有土舉朝不解以問東方朔朔曰臣愚不足以知之可試問西域胡法蘭至明帝時外國道人來洛陽有憶方朔言者乃試以昆明池灰墨問之胡人云天地大劫將盡則劫燒此劫燒之餘也謂之劫灰方知朔言有旨按昆明本西南夷國名即滇國也滇池在雲南府城南周廣五百里合盤龍江及黃龍溪諸水匯為此池中產衣鉢蓮花盤千葉蓋分三色下流為螳螂川中有大小卧納



二山後為漢武帝平之以其地為益州郡其所鑿昆明池在今西安府城內上林苑中帝欲伐昆明夷以其國有滇池乃穿池象之以習水戰周迴四十里其中有戈船樓船數百艘置二石人相對以象牽牛織女刻石為鯨魚每雷動常吼鬣鬣皆動至昭帝幼沖不習攻戰于中養魚以給諸陵又關中記所載堯治水訖停舟昆明池則此池堯時已有漢特因而深之耳史記滇水源廣末狹有似倒流故曰滇

池砌文石

杜陽雜編唐元載芸暉堂前有池悉以文石砌岸中有蘋陽花亦類白蘋其花紅而且大若牡丹又有碧芙蓉

米芾投蛙

無為州西北有墨池宋米芾為守時所穿初厭池中蛙聲取瓦書字投之自是無蛙鳴

習郁養魚

襄陽記荊陽峴山南有習家魚池後漢習穿此池依范

蠡養魚法中有釣臺晉山簡永嘉三年鎮襄陽每出遊  
戲多在池上飲輒醉而歸名曰高陽池

採珠

廉州府城東南有珠母海海中有平江懸梅青嬰三池  
池中出大蚌蚌中有珠每月明之夜其光燭天即古合  
浦珠也人採珠者乘舟入池以長繩繫腰攜竹籃入水  
拾蚌置籃內則振繩令舟人汲取之不幸遇惡魚有一  
線之血浮水面則知人已葬魚腹矣

淬鐵

宋歐陽程永州府營道人少為郡吏郡後有池常淬鐵  
為戎器名鐵作池植亭其旁一日太守於吏牘間得副  
紙記池亭之勝有寒影倒吞凌漢樹冷光高浴半天星  
之句問知為程詩大驚異之與之金使歸為學登進士  
第累官屯田員外郎

卧冰

望江縣地稱三孝有孟宗泣竹臺徐仲源孝感山其一

則王祥卧冰池也

凌波

太真外傳唐玄宗在東郡晝夢一女容貌艷異拜於牀  
前上問汝是何人對曰妾是陛下凌波池中龍女衛宮  
護駕妾實有功今陛下洞曉鈞天之樂乞賜一曲以光  
族類上於夢中為鼓胡琴採新舊之曲為凌波曲龍女  
再拜而去及覺上盡記之會禁樂乃自御琵琶習而翻  
之與文武臣僚於凌波宮臨池奏新曲池中波濤湧起復

有神女出池心乃所夢之女也上大悅語於宰相因於池上立廟歲祀焉

聖水

杭州慈聖院有吕公池宋乾道間高僧能取池水呪之以施病者輒愈號聖水池

仙源

仙源池在四川敘州府南溪縣北劉景鶴嘗用此水以煉丹

醒酒

宋時洛陽有董氏東西園園中有大池中為堂榜曰含  
碧水四面噴瀉池中而陰出之故朝夕如飛瀑而池不  
溢洛陽人盛醉走登其堂輒醒故俗號池曰醒酒池

浴丹

浴丹池在保寧府劔安普安縣唐杜光庭煉丹之所

產馬

四川黎州安撫司蠻部有池內產馬名渥洼池

棄龜

宋徽宗大觀中都水使者趙霆得兩首龜於黃河獻以  
為瑞蔡京曰此齊小白所謂象罔見之而霸者也鄭居  
中言首豈有二人皆駭異而京獨主之殆不可測帝命  
棄龜於金明池按金明池周世宗時所穿宋太祖嘗幸  
此觀習水戰

太子

吳有太子池孫權子和所穿



相國

相國池在湖州府烏程縣治內唐大厯中李晤官於烏程子紳甫一歲數墮此池若有物扶持而出後為相國後人因以名池

皓月

汝寧府確山縣西北有朗山避宋廟諱改名樂山山頂有池名皓月中有四季蓮花可供遊賞

瑞星

廣東雷州府南有瑞星池即寇萊公舊居也宋天聖間有星隕於池翌日求之得一石

### 金龍

金龍池在平陽府平山之麓晉永嘉中有韓媪者於野中見巨卵育之得嬰兒字曰掬兒方四歲劉淵築平陽城不就募能城者掬兒應募因化為蛇令媪遺灰誌其後謂媪曰憑灰築城可立竟如所言淵怪異之命使追蛇遂投入山穴中露尾數寸使者斬之忽有泉自穴中

出匯而為池因名金龍

金鷲

金鷲池在丹陽縣治內宋夏竦為本縣掾一日侍母燕坐見黃鸝雙沒於地發之得金鷲二其母取瘞之竦因亭其上後人發地求之不得遂為池因名金鷲

義之滌墨

紹興叢山戒珠寺前有鷲池晉王羲之善筆札性復好鷲所在穿池滌墨其旁有牧鷲之所

蔡倫造紙

衡州府耒陽縣西南有蔡子池漢蔡倫造紙處

洲

水中漲沙曰洲

鸚鵡

鸚鵡洲在武昌府通城縣南跨城西大江中尾直黃鵠磯即黃祖殺禰衡處衡嘗作鸚鵡賦死葬於此因以名

洲

騏驎

騏驎洲在邵武府泰寧縣西南昔越王戲馬於此

白鷺

白鷺洲在應天府西南江中唐李白詩二水中分白鷺洲宋曹彬大破江南兵即此處也一在廬陵城東贛江中

黃龍

黃龍洲在延平府城東每春水後視此洲沙多寡占歲

豐歉

白馬

白馬洲在岳州府澧州之東相傳為唐林靜先生乘白馬飛昇處

黃牛

黃牛洲在南昌府城西南相傳許遜逐蛟精蛟化為黃牛於此因名

金沙

金沙洲在岳州府洞庭湖中一名龍堆延袤數里又名  
金沙堆

寶蓋

寶蓋洲在建寧府建陽縣北相傳閩王審知有一叛將  
敗亡以其所竊寶蓋棄此因名

乘龍

乘龍洲在鳳陽舊府城北淮水中昔周世宗征濠夜遣  
兵持炬乘橐駝絕濠兵士驚以為鬼乘龍也因以名洲

繫龍

梧州城東五里大江中有繫龍洲首戴石阜尾蟠石鱗  
宛然龍形中有沙石或斷或續直至城西隅若貫索鎖  
繫此龍故名每冬月水涸則桂江與大江之舟皆循流  
至洲尾乃汴流而上蓋天造地設以鎮梧州水口云

鳳麟

鳳麟洲在西海中央地方一千五百里洲四面有弱水  
遶之鴻毛不浮不可越也洲上有鳳麟數萬各自為羣



龍馬

龍馬洲在南昌府進賢縣北軍山湖畔舉目有湖山之勝文士多樂遊之

彭城

彭城洲在岳州府城東北劉宋元嘉中謝晦反到彥之進討軍次彭城洲即此

羅刹

羅刹洲在安慶府境宋端平初移治於羅刹洲又移於

楊槎洲至景定初始移治宜城渡今府城是也

大哀小哀

大小哀洲在長沙府湘陰縣南昔虞舜南巡二妃從之  
不及哭弔於此

南布東布

通州南四十里大江中沙漲為洲有南布洲東布洲相  
傳有布機流至沙上因名

杜若

謝朓詩芳洲生杜若宋陸游詠敘州西樓詩畫船衝雨  
入戎州縹緲山橫杜若洲須信平時邊堠靜傳風夜夜  
到西樓

荔枝

荔枝洲在廣州府城東周圍可五十里南漢劉氏嘗創  
昌華苑於其上

金魚

金魚洲在長沙府醴陵治前其狀如魚一在泰和縣東

銅魚

銅魚洲在四川順慶府渠縣南下有石磧黃色如魚狀  
舊傳開科之歲水聲異常必有中者諺云銅魚灘聲吼  
士子占科首

馬渡洲

廉州府珠母海中有圍洲周迴一百里昔有野馬渡此  
又名馬渡洲

鴻宿洲

鴻宿洲在黃州府蘄州西大江中秋冬有鴻集于此

白蘋

白蘋洲在湖州府霅溪東南梁太守柳惲江南曲云汀洲採白蘋日暮江南春後人因以名洲上有白蘋亭

紫苑

紫苑洲在湖廣寶慶府武岡州以洲產紫苑故名

訾家洲

訾家洲在桂林府城東南先是為訾家所居故名雖巨

浸不能沒自古以為浮洲柳宗元有記

吳家洲

吳家洲在南昌府西南相傳吳綵鸞至此故名上有聖母廟又有滕家郭家二洲南北相去十數里又豐城縣有三洲謂楊林洲金雞洲牛宿洲也

狀元

狀元洲在醴陵縣治前相傳洲過縣前即出狀元

大人

言行錄宋時逆亮犯順李顯忠以池州都督移軍舒城  
除御營先鋒都統制堠騎報虜兵萬人渡淮公領趙康  
年等與虜戰於大人洲首挫其鋒乘勝掩擊過淮虜兵  
溺死者千餘人

橘洲

橘洲在長沙府善化縣西上多美橘故名又湘江中有  
四洲曰橘洲曰直洲曰誓洲曰白小洲夏月水泛惟橘  
洲不沒諺云昭潭無底橘洲浮

蘆洲

蘆洲在武昌縣西相傳伍子胥逃楚至江上求渡漁父曰日月昭乎寢已馳與子期乎蘆之漪子胥既渡解劍與之不受子胥令其勿露漁父遂覆舟而死即此處

爛船

爛船洲在衡州府桃源縣南秦人洞後世傳晉時漁郎放舟入洞即此及出其舟已爛故名其洲

覆金



覆釜洲在沔陽景陵縣治西以形似名即唐陸羽隱居之地

孫洲

孫洲在杭州府富陽縣吳孫堅初為郡吏赴府鄉人餞於洲上父老曰此洲狹而長君其為長沙太守乎後果應其言且堅從長沙起兵為吳始祖後人因名曰孫洲

蔡洲

蔡洲在襄陽府東北漢水中後漢蔡瑁居其上曹操嘗

造其家

琵琶

琵琶洲在饒州府餘干縣治南水中擁沙成洲狀如琵琶  
宋汪洋詩塞外風烟能記否天涯淪落自心知眼前  
風物參差是只欠江州司馬詩一在處州府好溪上

珊瑚

外國傳大秦國西南漲海中可八百里到珊瑚洲洲底  
有盤石珊瑚生其 upper 人以鐵網取之

虎頭

虎頭洲在撫州府城北宋治平中郡人李懽夜夢有人張樂送至洲上未幾登科授虔州司理蓋虎頭之應也

蛇骨

蛇骨洲在南康府都昌縣東南晉永嘉中有蛇長三十餘丈斷道以氣吸人被吞噬者蓋百數許遜有神術率弟子往殺之聚骨成洲

鷓鴣

鷓鴣洲在瑞州府上高縣羅漢石之東正當縣之水口

老鴉

老鴉洲在雷州府抵瓊州府界四里

楊葉

楊葉洲在九江府西半屬彭澤縣以東屬池州界洲上

多楊柳

蓮花

蓮花洲在南康府建昌縣西江心諺云蓮花到縣前建

昌出狀元

迷子

迷子洲在應天府西南王安石詩洲荻藏迷子

仙姑

仙姑洲在瑞州府上高縣西相傳有仙女嘗遊此

門前洲

晉殷仲堪見流棺葬之旬日間門前之溝忽起為岸其夕有人自稱徐伯玄感君之惠無以報也水有岬為洲

君將為州矣後果臨荊州又宋張興世初生門前水中忽起洲及為方伯洲生至十餘處

館前洲

館前洲在邵武府建寧縣東水中央狀如遊魚出水

百里

百里洲在荊州府枝江縣東北周迴百餘里梁史陸法和有異術隱百里洲即此又縣有九十九洲未及滿百宋文帝在藩忽生一洲未幾嗣位

萬石

萬石洲在臨江府南大江環其前袁江帶其後其地夷曠肥饒歲收倍常因名

流桑

見水

種荻

漢陽府城南大江中有劉公洲宋元祐中沙洲湧出知軍事劉誼種荻其上因名

周瑜犒士

黃梅縣南大江之北有散花洲周瑜戰勝犒士散花於此

張澄習軍

南昌府東湖之北有百花洲宋紹興中張澄建亭其上以習水軍因扁曰講武況志寧有詩又蘇州姑蘇山上及南陽鄧州城南俱有此洲

溪



爾雅水注川曰溪注溪曰谷注谷曰溝注溝曰澮注  
澮曰瀆

禹鑿

紹興府嵊縣餘糧山下有了溪越絕書禹鑿了溪人方  
宅宋王十朋詩禹蹟始壺口禹功終了溪餘糧散幽谷  
歸去錫玄圭

越來

蘇州楞伽山東北有越來溪與石湖通郡志云越侵吳

自此入故名溪上有越成橋

呂望得璜

尚書太傅呂望釣蟠溪於魚腹中得玉璜溪在鳳翔府寶雞縣東南谷中石壁深邃林木秀阻中有石室

歐冶鑄劍

若耶溪在紹興府城南與鏡湖合昔西施採蓮歐冶鑄劍卽此處

茹蘭

如蘭溪在池州府建德縣南其源出迎春朝霞二洞之間西流會堯城

浣花

浣花溪在成都府城西南杜子美至成都劔南節度使裴冕為卜西郭浣花溪作草堂以居之一名百花潭按吳中復冀國夫人任氏碑記夫人微時有一僧墜汚渠中為濯其衣見百花滿潭因名其潭曰浣花又唐妓薛濤家於潭旁以潭水造紙為十色箋

九曲

九曲溪在武夷山九曲繚繞貫於羣岫之間出石鼓渡合於建溪

四安

湖州府長興縣四安山有水會茗溪名四安溪

雙月

桂林府陽朔縣南有雙月溪溪上有雙月橋滁州琅琊山側有明月溪宋王禹偁詩惜哉幽勝事盡落唐賢手

惟餘舊時月團團照山口

七星

建寧府政和縣南有七星溪發源銅盤山入建溪

餘甌

餘甌溪在浙江長興縣南傍有餘甌村故名梁武帝時  
童謠云王氣在三餘乃於餘千餘姚餘杭為厭勝之法  
時長興有餘千山餘甌水餘魚浦而陳武帝實當之魚  
本作吾吳越之音訛耳

罨畫

長興縣西有罨畫溪古木夾岸叢條翳其下朱藤蔽其上如是者十里花時遊人競集溪上有罨畫亭唐鄭谷詩顧渚山邊郡溪將罨畫通按罨畫籠色畫也

成式去怪

處州東有惡溪多水怪唐宣宗時刺史段成式有善政怪潛去民謂之好溪

路旻平險

祁門縣南有閭門灘灘有二巨石對峙如門其水下流入鄱陽界合於大江灘善覆舟唐縣令路旻開斗門以平其險人呼路公溪

躍馬

先主乘的盧馬西走至檀溪一躍三丈而過以免劉表之追溪在襄陽府西

斬蛟

宜興縣有荆溪在荆山之北故名上通蕪湖下注震澤

達松江而入於海周孝侯嘗斬蛟於此

磨鍼

磨鍼溪在睢州彭山縣象耳山下唐李白讀書於此學  
未成棄去適過是溪逢老媪方磨鐵杵白問媪何為荅  
曰欲作鍼耳白感其言遂還卒業媪自言姓武溪有  
武氏巖

浣紗

浣紗溪在處州青田縣南謝靈運遊石門洞至此遇二



女浣紗水邊靈運作詩嘲之女亦以詩荅之忽不見

希聲蒙溪

陸希聲居當溪之側名其溪曰蒙溪

子厚愚溪

柳子厚愚溪序灌水之陽有溪焉東流於瀟水或曰冉氏嘗居也故名冉溪余以愚觸罪謫瀟水上愛是溪故更名為愚溪又為愚邱愚泉愚浦愚池愚堂愚亭愚島作八愚詩紀於溪石之上

元結命名

浯溪在永州府祁陽縣南流入湘江唐元結自道州歸  
愛其山水因家焉作大唐中興頌顏真卿大書刻於崖  
上結又為嵒臺唐亭石室諸銘宋陳衍曰元氏始命名  
之意因水以為浯溪因山以為嵒山作室以為唐亭三  
吾之稱我所自也字從水從山從唐我所命也三者之  
目皆自吾焉我所擅而有也

沈括入夢

丹陽朱方門外有夢溪焉宋沈括嘗夢至一小山花如  
覆錦喬木蓊鬱山下有水甚樂之後謫居潤州宛如夢  
中遂築室居焉因名夢溪

茗溪

茗溪在杭州餘杭縣治前發源天目夾岸多茗花每秋  
時飄散水上如飛雪

竹溪

唐李白與孔巢父韓準裴政張叔明陶隱居在泰安州

徂徠山日沈飲號竹溪六逸

甘棠

廣西靈川縣東有甘棠溪西過白石湫合灘江

香稻

南寧府橫州西有香稻溪溪傍產香稻故名

沐鶴

沐鶴溪在處州青田縣西南相傳浮丘伯沐鶴於此

蟠龍

夔州府梁山南有蟠龍溪

黃浦

黃浦溪在山陽縣南溪東南流者入射陽湖西流者入雙清溝

白洋

白洋溪在宣城縣出華陽山東流者經天門山過寒亭又經行廊山入清弋江西流者過魯廟東北流者為魯溪入於白溪

藤花映水

宜興縣東南有東瀉溪唐陸希聲顧山錄謂山前百餘步衆流合而東行故溪名東瀉春時兩岸藤花照映水中青紅可愛

桃花夾岸

陶潛桃源記晉太元中武陵人乘舟捕魚沿溪行忽逢桃花林夾岸數百步芳華鮮美落英繽紛復前行得一小山有小口彷彿有光便捨舟從山口入初極狹行數

十步豁然開敞土地平曠屋舍儼然阡陌交通雞犬相聞其中往來種作男女衣著悉如外人黃髮垂髫並怡然自樂見漁人太驚問所從來具答所以便欲還家為設酒作食村中人咸來問訊自云先世避秦亂率妻子邑人來絕境不復出問今是何世乃不知有漢及魏晉此人一一為言傳數日辭去既出得其舟便扶向路處處誌之及至郡詣太守言之太守即遣人隨往尋問所誌遂迷惑不復得路南陽高士劉子驥聞之欣然欲親

往未果尋以病終後遂無問津者

一縱一橫

丁溪在泉州府德化縣南俗云水畫丁羅簪纓宋時一  
夕雷雨決流一縱一橫宛成丁字邑人程楊休果登高  
第

十溢十竭

王韶之始興記連州水下流名斟溪一日十溢十竭

溪有二灘



百步溪在台州府臨海縣西溪有二灘甚湍急俗名大小惡溪孟浩然詩欲尋華頂去不憚惡溪名

溪有三源

八旬溪在雲南廣西府彌勒州治西其源有三一出阿欲山一出舊村一出北傾山

道錫牽鼎

銅鼎溪在南海縣界南越志天清水澄見其中鼎鉉刺史劉道錫過此溪繫其耳而牽之耳脫而鼎潛入溪中

民以為神又雷州府遂溪縣東南有鐵杷溪中有石似鐵杷故名

茂叔濯纓

濂溪在永州府道州之西宋儒周敦頤家世於此後寓居江州而老於廬山之下不欲忘其所自因取故里之號以名其川故九江府亦有濂溪云黃山谷濂溪詩序春陵周茂叔胸中灑落如光風霽月好讀書雅志林壑中歲乞身老於湓城有水發源蓮花峰之下潔清甘寒

合於湓江茂叔濯纓而樂之築室其間用其平生所安  
媿水而成名曰濂溪按湓城今在德化縣城南九十里  
漢置柴桑縣隋改曰湓城

見俞兒

齊桓公北征孤竹國將至卑耳溪見一人長尺許而人  
物衣冠具焉右祛衣走馬前疾導以問左右左右不見  
也管仲曰此登山之神俞兒也臣聞霸王之君興則登  
山之神見且走馬前導也祛衣示前有水也右祛衣示

右方涉也及至溪從左方涉其深及冠從右方涉其深至膝桓公既涉果得孤竹遂霸天下桓公遂再拜曰仲父之聖至此按孤竹今永平府古郡名

遇鮑姑

武昌府咸寧縣有蘋花溪相傳洪崖先生煉丹之地嘗見一老姥於此採蘋莫測所自來或問之荅曰吾鮑姑也忽不見

盧敖棲息

盧棲溪在處州府景寧縣東有洞廣數丈唐道士盧敖  
棲息其中洞旁多筍味甚佳亦號盧棲筍溪旁有竹無  
風自動

庭堅遊樂

涪溪在敘州府北宋黃庭堅遷涪州別駕號涪翁後安  
置戎州遊是溪而樂之故名涪溪戎州今為戎縣屬敘  
州府

董黯奉母

慈溪在慈溪縣西南舊名大隱東漢董黯因母疾思飲此溪水築室溪上以便取汲故後人以慈名溪

李綱謫官

延平府沙縣七峰之下有太史溪宋李綱初以太史謫官於此故名

徽之訪友

剡溪在剡縣治南一名戴溪即晉王徽之雪夜乘舟訪戴逵處

思齊征蠻

湖廣靖州通道縣境有鑿字溪按廣西界宋元豐間於溪旁得古碑乃唐久視元年遣將王思齊率兵征蠻過此隔碍山險負舟而濟鏡石以紀歲月而夷人以為鑿字溪

太守脩禊

岳陽溪在潼川州安岳縣西太守彭乘臨溪鑿石為曲水每歲脩禊於此名翰林灘以乘嘗官翰林也

仙人投丹

靈壽溪在柳州府融縣南相傳仙人嘗投丹於中飲者皆得壽

馬鳴

馬鳴溪在敘州府發源慶符縣西會馬湖江達於蜀昔土人鄭氏牧馬溪上馬產龍駒朱駿頰尾高可七尺將以為貢至溪振鬣長鳴躍入於水故名

虎號



虎溪在九江府城南晉僧慧遠法師送客不過此溪過則虎輒鳴號故名虎溪後與陶淵明陸脩靜語道契合不覺過之因大笑世傳虎溪三笑圖

山影棹聲

宋張子野題無相院西溪詩積水涵虛上下清幾家門靜浪痕平浮萍破處見山影小艇歸時聞棹聲入郭僧尋塵裡去過橋人似鏡中行已憑暫雨添秋色莫放秋蘆礙目生

沙平石淺

唐岑參東溪詩溪水碧於草潺潺花底流沙平堪濯足  
石淺不勝舟洗藥朝與暮釣魚春復秋興來從所適還  
欲向滄洲

白牛

隋王通號文中子講道於白牛溪

黃龍

黃龍溪在泉州府南安縣南宋王十朋詩清源太守鬢


蓬鬆未遂歸農又勸農農事方興天不雨誰能喚起老黃龍

四水激射

湖州府治南有雪溪以其合四溪水為一溪故曰雪四溪者謂苕溪前溪餘不溪北流水也一說四水激射雪然有聲故名雪溪一名雪川湖州古地名曰雪川以此雙澗合流

虎踏溪在處州府宣平縣南雙澗合流昔有人擊虎於

此



山堂肆考卷二十四

欽定四庫全書

子部

山堂肆考卷二十五

六

詳校官中書臣孫溶

主事臣祁韻士履勘

總校官臣降調編修倉聖脉

校對官主事臣陳墉

謄錄監生臣黃廷璧

欽定四庫全書

山堂肆考卷二十五

明 彭大翼 撰

地理

井

世本黃帝鑿井聚民為邑淮南子曰伯益鑿井而龍

登玄雲神棲崑崙

神農社

盛弘之荊州記隋郡北界有屬鄉村村南有重山山下

有一穴父老相傳神農所生地中有九井汲一井餘井水皆動後人即以此為神農社歲祠之

老子廟

劉義慶幽明錄襄邑縣南濼鄉有老子廟廟中有九井能潔齋入祠者水輒澄清隨人意念

投轄留客

漢書陳遵字孟公性嗜酒每飲賓客取轄投井中雖有急不得去



移書諭神

唐韓朝宗為襄州刺史城中有昭王井汲者必死雖渴  
困人不敢窺視朝宗移書諭神自此飲者無恙人號韓  
公井

懸壺

周禮夏官挈壺氏掌挈壺以令軍井注云為軍穿井成  
挈壺懸其上令士衆知之

負缶

說苑衛有五大夫俱負缶入井出而灌韭終日竟一區  
鄧析過下車教之曰為機重後輕前命曰桔槔終日可  
溉百區五丈夫曰吾聞師言有機智之巧必有機智之  
心吾不為也

埋砂致壽

抱朴子曰余亡祖鴻臚少時為臨沅令云此縣有廖氏  
家世壽考疑其井水殊赤乃試掘井左右得古人埋丹  
砂數十斛

得錢展業

王隱晉書上黨鮑陸家多凶喪淳于智卜之曰君安宅不利爾可徑至市門當有一人賣新馬鞭者便就買還懸舍東北大樹三年當暴得財陸承言詣市得馬鞭懸之三年井中果得錢數十萬於是業用既展家亦無恙

鳩出

戴延之西征記板渚津南原上有厄井父老相傳漢祖與楚戰敗逃此井追軍至見兩鳩從井中出得免厄

鳥巢

劉敬叔異苑蘭陵昌慮縣郢城有華山山上有井有鳥巢其中此鳥金翅黑色見則必大水

玉羊

韓詩外傳魯哀公使人穿井三月不得泉得一玉羊焉哀公懼孔子聞之見公曰臣聞水之精為玉土之精為羊此羊肝必土爾公使人殺羊視之果然

金魚

敘州府城南有金魚井中有金魚故名宋黃廷堅貶涪州酷好茶令人徧汲井水試之惟此井水品為第一

井邊種橘

列僊傳蘇耽啓母曰有賓來會耽當僊去違於供養明年天下病疫庭中井水井邊種橘可以代養井水一升橘葉一枝可以療一人來年果疫母如言救之無不愈者

井中瀉莖

金陵記江南計吏止於傳舍及將就路以馬踐草瀉井中謂已不復再過不久復由此飲遂為昔時壅刺喉而死後人以此為戒曰千里井不瀉莖

投壘

張勃吳錄初漢黃門張讓等劫天子北至河上傳國壘投於井中及孫堅討董卓入洛屯軍城南望見甄官井上有五色氣使人入井得傳國壘

得鐘

晉書晉元帝大興初會稽人於井中得一鐘上有古文  
十八字郭璞曰王者之作必有靈符

紫沫

安慶府望江縣菩提寺北有司馬龍井相傳嘗有紫沫  
浮井上累日始散識者云此龍涎也

紅光

左慈井在廬江縣南相傳慈嘗置丹一粒於井中宋政  
和間每清夜氣肅輒有紅光熒然燭天

龍出東箱井

涼州記慕容氏咸寧二年夜見龍出東箱井中行大殿前蟠卧旦視其鱗甲足跡尚有濕處

龍入後宮井

梁書高祖郗后性極妬及終化為龍入後宮井中通夢於帝或見形光彩照灼帝體不安龍輒激水騰湧帝於是井上設衣服及百味祀之竟不敢復立后

洗藥



長沙府有洗藥井相傳孫思邈濯丹之所

煉丹

秦少游龍井記龍井即舊龍泓距錢塘十里吳赤烏中  
方士葛洪煉丹於此當西湖之西浙江之北風篁嶺之  
上竇深山亂石中之泉也相傳有龍居之故曰龍井

應潮

金陵鍾山頭陀寺第一峰有應潮井其泉與江潮盈縮  
相應故名石邁古跡編井內時得斷帆朽木之屬

鎮石

嶺表錄異綠珠井在白州雙角山下昔梁氏女有姿容  
石崇為交州採訪使以珠三斛買之今舊井存焉相傳  
飲此水者誕女多美麗閭里以美色無益於時遂以巨  
石鎮之自後產女雖美然七竅四體多不完具又汝州  
諸井皆以夾錫錢鎮之問其故一老兵曰此邦饒風沙  
沙入井人飲之則成癭夾錫錢所以治沙土也

臨邛火井

異說臨邛縣有火井漢室之盛則其勢赫熾桓靈時漸微孔明一窺而更盛至景曜元年人以燭投之即滅此年蜀併於魏

荊州風井

荊州記有井曰風井夏則風出冬則風入

出雲

洞冥記長安東七萬里有雲山山頭有井雲從中出若土德王則黃雲出火德王則赤雲出水德王則黑雲出

金德王則白雲出木德王則青雲出

興霧

見霧

擲瓦變甘

兗州府單縣東北隅有呂井俗傳呂僊翁與單父人惠翁遊苦其水鹹擲瓦井中水遂變為甘美

分器息開

高士傳管寧所居七落會人來汲水者男女錯雜爭井

喧鬧寧患之乃多買器分井旁汲以待之

寶公

寶誌公井在上元縣大市街心宋曾拯詩塵容俗狀慚  
窺影欲汲寒泉洗此心

玉女

玉女井在高郵治西南東齊郊道光與其女居井旁煉  
丹故名宋崔伯易有記

彭祖

彭祖井在徐州城西北隅彭祖舊宅唐皇甫冉有詩宋  
陳靖作彭祖觀井圖銘并序

崔婆

崔婆井在衡州府西崔婆宅宋張虛白舉進士不利辟  
穀而遊至此崔婆飲以醇酒後虛白僊去郡人余安遇  
虛白於楊州因寄崔婆詩武陵溪畔崔婆酒天上應無  
地下有南來道士飲一斗醉卧白雲深洞口又楊妃井  
在容縣西

賈誼穿

荊州記湘州南寺之東為賈誼宅有井甚深上斂下大狀似壺即誼所穿井也今為陶侃廟

東坡鑿

東坡井在廣州府玄妙觀之西東坡寓居所鑿得一石如龜名龜鼎

織女繰絲

泰州西溪鎮有繰絲井世傳漢董永寓居於此家貧父

亡貸主人萬錢葬父許身為奴道遇一女求為妻同造  
主人約織縑三百足以償所貸二月而畢遂辭永曰我  
天之織女也天帝以君孝遣我助之言訖凌雲而去井  
即女所以縑絲者一說永本千乘人少失母獨養父流  
寓孝感千乘今青州地孝感湖廣屬縣也

金人撞杵

衡州府益陽縣有平岡岡上有金井數百所深不可測  
相傳有金人以杵撞地而成故名金井又南康記雲都



盤固山其上有井大銅人守之五十年一涌水起至數十丈銅人每以手掩之

灌嬰銘

見水風起輒動

鮑照謎

鮑照井謎一八四八飛泉仰流解云一八四八五八也五八四十即井字

以銀作牀

淮南王詩後園鑿井銀作牀金瓶素綆汲寒漿杜詩露井凍銀牀

以玉為檻

山海經注崑崙墟在西北帝之下都高萬仞面有九井以玉為檻

珉玉為績

水經注華林園有古井悉以珉玉為績石為口工作精密

雕木為盤

雲林異景志唐霍僊鳴別墅在龍門一室之中開九井皆以雕鏤木為盤覆之夏月坐其上九井生涼不知暑氣

胭脂

胭脂井在上元縣臺城內又名辱井昔陳後主與張麗華孔貴嬪投其中以避隋兵井欄石脉有胭脂痕故名宋曾南豐有辱井銘蓋耻後主之死也

琉璃

琉璃井在潁州治東南井底有青石八片光瑩如琉璃故名

杜公誠心

新城縣有杜公井唐乾寧中董昌圍急城中乏水穿百丈不得都將杜稜誠心禱之泉立至

賈耽妙手

廣記賈耽鎮滑臺城北鑿八角井以鎮黃河於是潛令

人伺之果有老父至問曰誰人鑿此曰賈君老父曰大  
妙手但近東近西近南近北耳耽問之曰是井太大也  
洞

茅君傳大天之內有玄中之洞三十六所

偃月

全椒縣龍蟠山上有虎跑泉桃花洞偃月洞

棲霞

桂林府七星山畔有棲霞洞緣磴而上入石門百步始

坦夷可坐數十人其下復有洞入半里許遇大壑不可  
進有路北行頗僂而前數步復寬衍兩旁十餘丈石乳  
下垂如玉簪珠旒寒泉怪石交映疊出世傳穴通九疑  
山洞有老君像唐明皇置

白雲

白雲洞在南康府西山頂白雲常出入洞口有白雲菴  
玄風

玄風洞在桂林府七星山下慶林觀後洞口底下陰風

襲人又麻姑山頂有丹霞洞

還珠

還珠洞在桂林府伏波山下俯瞰灘水中可容二十榻戶牖穿透石如蒼玉旁垂一石柱下至平地不合者纔一線許俗號伏波試劍石相傳前代有一漁者洞中行數百步漸明朗見一物如犬瞑目而睡前有一珠甚光瑩因急懷歸官府尋知之意其為異物亟命還之漁人復至洞中此物猶未醒故後人名洞曰還珠

鳴玉

鳴玉洞在桂林府陽朔縣西南洞廣大深邃有石乳下懸又有石牀石笋石盤諸狀泉聲琮琤如鳴玉故名舊名梵音

金雞

金雞洞在陽朔縣西南官道之側周回有山一在縣西十里中有小江江上乳石燦如龍鱗

石牛



石牛洞其石狀似牛也在潛山縣西北宋黃庭堅讀書於此因號山谷道人中有李公麟畫庭堅坐石牛像

### 白鹿

南康府五老峰下有白鹿洞唐李渤與兄涉俱隱此養白鹿因以名洞宋寧宗即位召朱熹入朝為相因忤權臣在位四十六日而歸遂入白鹿洞著書即此

### 黃龍

杭州葛嶺之後有黃龍洞宋淳祐間經略花園使孟珙

建護國仁王禪寺自其趾斗折而上有洞豁深杳不測相傳夏初雨霽時常有神物蜿蜒卧松上蓋黃龍也平涼府崆峒山東岩之半有皂鶴洞

呼猿

杭州武陵山有呼猿洞在飛來峰之西冷泉亭之左晉僧慧理嘗畜白猿於此劉宋有僧智一因訪舊蹟亦於洞中畜猿臨洞長嘯則諸猿畢集故名

飛鼠

博白縣南有將軍洞一名飛鼠洞

落馬

岳州府古門縣有落馬洞相傳漢昭烈落馬於此

投龍

投龍洞在南昌府華林山唐明皇投金龍於此因名昭  
宗時里人費瑄避寇於此得明皇所投金簡玉環又鏤  
文八十六字

金粟

金粟洞在泉州府紫帽山相傳元德真人鄭文叔居之  
宋寧宗御書金粟之洞四字刻於石又詳見紫帽山注  
寶芝

寶芝洞在夔州府達縣鳳凰山頂有泉自洞中出衝沙  
漱石散而為乳與土相雜積成山峯嵌空奇崛自然天  
巧

國山三洞

善卷洞在宜興縣國山東南洞有三曰乾洞曰大水洞

曰小水洞周幽王時忽自開裂奇形怪狀宛如飛墮周圍峭壁刻以佛像有石筍高丈餘號玉柱宋熙寧初僧若冲與其徒秉燧以入行約三十里忽聞聲大震衆懼而返

隱山六洞

桂林府西有隱山唐李渤出鎮時見石門大開有水泓澈乃芟薙蕪穢疏通巖穴石林磴道若天造靈府因號隱山上有六洞曰朝陽夕陽南華北牖嘉蓮白雀等名

宋朱希顏呂愿中等各有詩

十房

十房洞在長沙府化縣北洞門廣丈餘門內若廳自廳入穴中有天窻左右列十房房各有門鐘鼓備具後有石田石池

雙城

湖廣施州衛城北有雙石城山山下有雙城洞荊州府夷陵縣西北有三游洞唐白居易與弟行簡及元稹三

人游此作三游洞記刻於石

白沙

白沙洞在梧州府北流縣勾漏山秉燭從竇入偃僂俯  
伏凡經六七竇行一里餘乃至勾漏山甲天下而此洞  
為勾漏第一樂清縣西有白石洞相傳十二真人所治  
之地王十朋有詩

朱明

羅浮山下有深洞號朱明曜真洞天洞中常有五百花

首真人遊會唐開元二十六年奉勅建花首臺天寶初  
詔道士申泰芝祭山欲尋朱明洞時邑簿任知宣領耆  
老尋見一洞因以藤垂一人下洞約五丈餘卻出云下  
視無底日月星辰無不備初有白雲須臾散漫成五色

通天

杭州北山有龍泓洞一名通天洞俗傳其底可通浙東  
壁間有蔣之奇篆書賈似道題名宋咸通中有高士丁  
飛字翰之居洞中讀書採藥力田自給



迎春

迎春洞在池州府建德縣東南七里高深如屋旁有兩穴可秉燭入宋政和中主簿左譽為記

留僊

鎮江府放鶴門內有西園宋韓蘄王故園也中有飛蓋堂留僊洞

昇真

宋陳覺民字達野嘗遊柘山過武夷題詩昇真洞云昇

真洞口接天門靈草丹桃日月春聽說列僊來瑞世三  
朝德業在新民按宋章聖皇帝及神考哲廟皆武夷君  
應世故云三朝德業章聖事見楊大年家集

聞作樂聲

乳水洞在順天府房山縣大房山東北有懸崖千尺餘  
下有石窟濶二丈許深不可測嘗聞作樂聲唐胡詹有  
記昔人有篝火浮舟探之者行五六日莫究其源但見  
僊鼠晝飛鰐鱗遊泳

聞誦經聲

夷堅志李允川政和間至和州遊遠郊忽墜一穴中黑如夜稍進漸明石池中荷花爛漫天日光耀又聞誦經聲不見人已而忽至道旁僧寺問僧乃滁州境也已過七日纔一晝耳其所墜乃華陽洞

金庭玉堂

台州府天台縣赤城山有玉京洞晉許邁嘗居此與王羲之書云自山陰至臨海多有金庭玉堂僊人芝草即

此

瓊章寶藏

括蒼洞在台州府僊居縣東南名曰成德隱元之天蓋  
第十洞天也宋光宗在東宮時書瓊章寶藏四字鎮之

石聳如雪

大城洞在宜興縣東南洞門僅容一人中漸平曠有白  
石高聳如雪號鹽米堆又有泉流縈繞之

泉湧如雷

九江府瑞昌縣西有玉華洞洞有僊跡泉湧如雷唐僧  
於洞中獲磬與錢皆漢時物

小兒握珠

龍城錄茅山隱士吳綽素擅潔譽神鳳初採藥華陽洞  
口見一小兒手把大珠三顆戲於松下綽因前問小兒  
忙奔入洞綽恐為物所害遂連呼相從入欲救之行不  
三十步見兒作龍形手握三珠填耳中綽素剛勇有膽  
略即以藥斧劖之落左耳而珠已失所在龍亦不見出

十餘步洞門已閉綽後封養素先生

童子刺船

稽神錄婺源縣有張公山洞洞穴如井咸寧末有洞靈觀道士以繩縋下百餘丈乃至底旁視有光崖有屋宇花木樹石宛然僊境有一道士方棋使一童子刺船至童子問欲渡否荅曰當還於是童子刺船而去鄭遂復縋而出明日井中出一石筍塞其口無復入者

千人避亂

湖廣桃源縣有桃源洞周回七十里秦時有千人入洞  
避亂

二姓聯婚

平樂府城東有陶李洞晉陶唐英李太尉謫居昭州故  
二姓聯婚至今子孫居之

石滴成盃

廬州府英山縣廣福山之側有洞曰龍潭其洞深遠泉  
滴石成竅如盃盃然

乳滴成像

酉陽雜俎昔有人遊南山乳洞洞深可數里乳旋滴漉成飛僊狀洞中已有數十處睂目衣服形製精巧如天成一處滴至腰已上其人因以手承漱之後經年再往見所承滴像已成矣乳不復滴當手承處衣缺二寸不就

兩崖鸞鶴

婺源縣西北有靈巖三洞東曰慶雲岩竇皆五色兩崖



有鸞鶴雲霞之象西曰蓮花有大石室刻石像於中旁  
有羽蓋幢節皆乳石所成南曰含虛洞有二重皆襟帶  
浙嶺通連率山

四僻魚鰕

南康記唐魚朝恩有洞房四僻夾安琉璃板中貯江水  
及萍藻魚鰕等物號魚藻洞

洞中得書

吳地記闔閭使靈威丈人入林屋洞十七日不得盡因

得禹書洞有三門同會一穴中有金庭玉柱靈跡漢劉  
根嘗於此學道

洞中刻經

石經洞在順天府房山縣石經山之東隋大業間法師  
靜琬處此募緣鑿石為板刻經一藏以傳後世至唐貞  
觀初僅成大涅槃一部而法師卒後子孫相繼歷遼金  
始完貯於洞者七穴者二洞以玉閉之穴以浮屠鎮之

蛇蟠

四川黎州安撫司城北邛崃山有靈應洞洞有巨蛇蟠  
其中一曰靈應將軍洞

鳶集

黎州安撫司東南避瘴山有乾濕二洞凡瘴欲動時飛  
鳶皆集此山瘴已乃出土人欲知無瘴以鳶出為候然  
鳶出以立冬前後

鳳石

桂林府獨秀山西有雪洞石壁垂乳潔白如雪唐人書

雪洞二字尚存旁有一石如鳳峙然因號雙鳳石

龍田

桂林府羅家山上有南潛洞自南竇入持炬入數步有乳石中峙乳巒巒然地有跡如龍爪所劃俗名龍田又本府隱山之北有北潛洞中有石室石臺又有石果作荔枝棗栗之狀

煙霞

煙霞洞在杭州府城南洞中舊有石刻羅漢六吳越王

別刻十二共成十八羅漢登州府寧海州東南大崑崙  
山亦有此洞王真人嘗於此修煉

水月

水月洞在桂林府宜山之北洞門透徹山頂高可數十  
餘丈其形正圓人遠望之明皎映空儼如月輪宋張孝  
祥改曰朝陽岩構亭其上亦曰朝陽亭後范成大始復  
舊名且為之銘

山堂肆考卷二十五